



Komunikado di Prensa 2020-022

“Ekspanshon konsiderabel den sektor di turismo”

Ekonomia di Sint Maarten a rekuperá vigorosamente na 2019

Willemstad/Philipsburg – “Na 2019, ekonomia di Sint Maarten a rekuperá vigorosamente. E pais a registrá un oumento di PIB real di 8,2% despues di un kaida di 6,6% na 2018 komo resultado di Orkan Irma. Den e Informe Anual di CBCS pa 2019, Presidente Interino di Centrale Bank van Curaçao en Sint Maarten (CBCS), dr. Jose Jardim a splika ku “loke a kontribuí prinsipalmente na e kresementu ekonómiko di Sint Maarten na 2019 ta un oumento supstansial den sektor di turismo”. El a agregá ku, na Sint Maarten, inflashon a baha drástikamente di 2,7% na 2018 te 0,4% na 2019, komo resultado di un bahada den preis di alimento.

Segun dr. Jardim, tur sektor di ekonomia di Sint Maarten a kontribuí na e kresementu real di PIB na 2019. A registrá un kresementu fuerte prinsipalmente den e sektornan di restorant i hotèl, di transporte, almasenamentu i komunikashon, i di komèrsio por mayor i detal. “Balor agregá real den sektor di restorant i hotèl a registrá un kambio drástiko. Despues di e kontrakshon fuerte di 2018, a sigui un ekspanshon konsiderabel na 2019, impulsá primeramente pa e rekuperashon ku a tuma lugá den turismo di estadia. El a splika ku “loke a kontribuí na e kresementu di turismo di estadia tabata e oumento gradual den kapasidat di kamber di hotèl i e oumento di kapasidat operashonal di Princess Juliana International Airport”. No opstante, el a opservá ku “aunke a registrá oumento di dos sifra den tur e merkadonan turístiko importante, ainda e kantidat di turista di estadia no a subi bèk na e mesun nivel di promé ku e orkan”. Tambe el a remarká: “Turismo di krusero a krese moderá, debí ku tin mas kompetensia di e otro destinashonnan den Karibe i algun destinashon asiátiko ta birando mas importante”.

Loke a impulsá e ekspanshon den sektor di transporte, almasenamentu i komunikashon ta un oumento di aktividat tantu na aeropuerto komo den haf. “Despues di reapertura parsial di e terminal prinsipal, e aeropuerto por a prosesá mas pasahero. Komo resultado, i konsistentemente ku e kresementu den turismo di estadia, tabatin un oumento den e kantidat

di pasahero prosesá i e kantidat di aterisahe komersial na e aeropuerto. Ademas, e aktivitatnan di e kompania aéreo lokal Winair a oumentá. El a splika ku “por mira e ekspanshon den haf na e oumento ku tabatin den e kantidat di barku, moderá pa un bahada den e kantidat di moveshon di kònteiner”. Segun dr. Jardim: “E resultado positivo den sektor di komèrsio por mayor i detal tabata danki na un oumento tantu den konsumo privá komo den gastu di turista. Konsistentemente ku e kresementu fuerte den turismo di estadia, tabatin un oumento di balor agregá real den sektor di propiedat inmóbil, hür i demas servisio komersial. “Prinsipalmente sektor di timeshare i e empresanan ku ta duna servisio na sektor di turismo a registrá resultado positivo”, segun Jardim. El a sigui bisa: “Loke a impulsá e kresementu den sektor di utilidat ta un oumento den produkshon di tantu awa komo elektrisidat. Sektor di servisio finansiero tambe a hasi un aporte positivo na e kresementu real di PIB. Por mira esei na e oumento ku tabatin den entrada neto di interes i den demas tarifa i entrada di e bankonan komersial lokal. Den sektor industrial, kresementu a mehorá, konsistentemente ku e oumento den e kantidat di yate den (área di) Simpson Bay Lagoon i haf di Philipsburg. Por último, el a mensioná ku “den sektor di konstrukshon tambe tabatin un oumento di aktividat, aunke ménos fuerte ku na 2018. Esei ta debí ku hopi di e aktivitatnan di rekonstrukshon despues di Orkan Irma a pasa e fase di mayor intensidat, miéntras ku algun proyekto di konstrukshon privá nobo a start”.

E teksto kompleto di e Informe di Presidente i e Informe Anual di Banko Sentral pa 2019 ta disponibel riba website di Banko Sentral <https://www.centralbank.cw/publications/annual-reports-quarterly-bulletins/2019>

Willemstad, 23 di yüli 2020

CENTRALE BANK VAN CURAÇAO EN SINT MAARTEN